

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. उपराज्यपाल मनोज सिन्हा होंरें आतंकवाद करी प्रभावित परौआरें दी सहायता लेई वेब पोर्टल दी शुरूआत कीती। केंद्र शासित प्रदेश दे नेह मामलें पर आपूं तक्क रक्खा'रदे न।
2. चला'रदी श्री अमरनाथ जी दी जातरा च अजें तगर 3 लक्ख 35 जहरा श्रद्धालुएं पवितर गुफा च मत्था टेकेआ।
3. मुख्यमंत्री उमर अब्दुल्ला होंरें राष्ट्री शिक्षा नीति सरबंधी कांफ्रेंस गी संबोधित करदे होई भविक्ख लेई तैयार करने आहली शिक्षा प्रति सरकार दी बचनबद्धता जाहिर कीती।
4. जम्मू खिते च भारी बरखा करी आम जन जीवन प्रभावित, 10 जिले च चानचक्क हाड़ औने दा अलर्ट जारी।

<><><><><><>

LG-Portal

आतंकवाद करी प्रभावित लोकें गी मदद देने दे मकसद कन्नै पुट्टी गेदी इक गेंs तैहत उपराज्यपाल मनोज सिन्हा होंरें अज्ज इक पोर्टल दी शुरूआत कीती। इस पोर्टल गी गृह मैहकमे आसेआ एन.आई.सी दे सहयोग कन्नै विकसित कीता गेआ ऐ। एह इक मंच दे तौरा पर कम्म करोग जेदे तैहत जिले स्हाबै आंकड़े किट्ठे करिए रक्खे जाडन। सोशल मीडिया दी इक पोस्ट च उपराज्यपाल होंरें आखेआ जे इस जत्न कन्नै केंद्र शासित प्रदेश च आतंकवाद करी प्रभावित लोकें गी राहत, सहायता ते होर दुई चाल्ली दी इमदाद हासिल करोआने च सखाल होग। उनें आखेआ जे जम्मू-कश्मीर च नेय सारे मामलें पर ओह आपूं तक्क रक्खा'रदे न ते उंदी निगरानी करा'रदे न।

<><><><><><>

Parliament-Adjourned

लोकसभा ते राज्यसभा दी कार्रवाई बक्ख-बक्ख मुद्दें पर विपक्ष दे हंगामे करी दिन भर लेई स्थगित करी दिती गेई। विपक्षी पार्टिएं दे सदस्यें ऑपरेशन सिंदूर ते बिहार च खास गइन पुनरीक्षण ते होरनें मुद्दें पर चर्चा दी मंग गी लेइयै नारेबाजी कीती। दपैहरी 2 बजे पैहले आहले स्थगन मगरा जिसले कार्रवाई परतिए शुरू होई तां विपक्ष नै परतिए शोर-शराबा कीता। संसदीय मामलें दे मंत्री किरण रिजिजू होंरें इस शोर-शराबे दी निंदेआ कीती ते आखेआ जे सरकार हर चर्चा लेई तैयार ऐ पर फीs बी विपक्ष संसदीय कार्रवाई च जानी-बुझिए विघ्न पा'रदा ऐ। संसदीय मंत्री किरण रिजिजू होंरें आखेआ।

<><><><><><>

Amarnath-Yatra

इस बर्रे आहली श्री अमरनाथ जी दी जातरा च अजें तगर 3 लक्ख 45 ज्हार श्रद्धालुएं पवितर गुफा च मत्था टेकेआ ऐ। एह गल्ल उपराज्यपाल मनोज सिन्हा होरें पहलगाम दे अपने दौरें दरान मीडिया कर्मिं गी संबोधित करदे होई आक्खी। उनें श्रद्धालुएं दे उत्साह ते खरी मती गिनतरी च इत्थे औने पर खुशी जाहिर कीती ते मेद ऐ जाहिर कीती जे श्रद्धालुएं दी गिनतरी च बाददा होग। उनें आखेआ जे पिछले 3-4 बरें दरान श्रद्धालुएं दी सुरक्षा लेई केई सारे इंतजाम कीते गे न ते हर बर्रे एह बेहतर होआ 'रती ऐ। इस मौके पर बोलदे होई उपराज्यपाल होरें आखेआ।

<><><><><><>

DGP-Buddha Amarnath

श्री बुड्डा अमरनाथ जी दी जातरा गी सुरक्षित ते बवस्था आहले ढंग्गै सिर करोआने लेई डीजीपी नलिन प्रभात होरें द'उं दिनें दा पुंछ दौरा कीता। इस मौके पर पुलस ते सेना दे वरिष्ठ अधिकारी बी उन्दे कन्नै हे। उनें सुरक्षा इंतजामें दा जायजा लैता ते जातरा दे आधार शिविर दा निरीक्षण कीता। इक उच्च सतह दी बैठक च डीजीपी होरें आपूं चै तालमेल बनाई रखने, ड्रोन राएं निगरानी, सी.सी.टी.वी कैमरे लाने पर जोर पाया। इस बारै होर जानकारी दिंदे होई स्हाड़े संवाददाता नै दस्सेआ।

<><><><><><>

CM-NEP

मुख्यमंत्री उमर अब्दुल्ला होरें शेर-ए-कश्मीर अंतरराष्ट्री कांफ्रेंस केंद्र च राष्ट्रीय शिक्षा नीति बारै आयोजित इक रोजा कांफ्रेंस च हिस्सा लैता। इस कांफ्रेंस दा विशेषार हा पूरे पराती शिक्षा लेई शैक्षणिक क्षेत्र दी अगुवाई करा'रदे लीडरें दा सशक्तिकरण। इस मौके पर शिक्षा मंत्री सकीना इत्तू होर बी उत्थे मौजूद हियां। किट्ठ गी संबोधित करदे होई मुख्यमंत्री होरें आखेआ जे सरकार जम्मू-कश्मीर च पूरा पराता, नमिं काहडें आहला ते भविक्ख लेई बच्चें गी तैयार करने आहला सरिस्ता कायम करने लेई बचनबद्ध ऐ। उनें शिक्षा आहले क्षेत्र च बदलाव आहनने ते विद्यार्थिं गी भविक्ख दिं चुनौतिं लेई तैयार करने लेई लेई सांझे जत्नें पर जोर पाया। उनें आखेआ।

<><><><><><>

DC Jammu I Day

जम्मू जिला दे डिप्टी कमिशनर सचिन कुमार वैश्य होरें अज्ज एम.ए स्टेडियम जम्मू च स्वतंत्रता दिवस-2025 समारोह दिरें तैयारियें गी खीरी रूप देने आस्तै इक समीक्षा बैठक दी अध्यक्षता कीती। सिविल प्रशासन, पुलस ते होरनें मैहकमें दे सीनियर अधिकारी बैठक च मजूद हे। डी.सी होरें सुरक्षा, बौहने, आमदोरफ्त प्रबंधन, सांस्कृतिक कार्जक्रमें ते लोकें दी हिस्सेदारी कन्नै सरबंधत बवस्थाएं दा जायजा लैता। उनें सब्बै मैहकमें गी इक कामयाब ते सम्मानजनक कार्जक्रम आस्तै सुचारू तालमेल जकीनी बनाने दे निर्देश दिते। साफ-सफाई, अमरजेंसी सेवां ते स्कूली विद्यार्थिं सने आम लोकें दी हिस्सेदारी जकीनी बनाने पर बी विशेष तौरा पर ध्यान केंद्रित कीता गेआ तां जे राष्ट्री त्यौहार गी बड़े उत्साह ते अनुशासन कन्नै मनाया जाई सकै।

<><><><><><>

DIPR-Competitions

स्वतंत्रता दिवस-2025 समारोहें दे हिस्से दे रूपै च जम्मू-कश्मीर सूचना ते जनसंपर्क मैहकमे नै देशभक्ति दी अभिव्यक्ति गी बढ़ावा देने दे मकसद कन्नै त्रै ऑनलाइन प्रतियोगितां शुरू कीतियां न, विशेष तौरा पर विद्यार्थियों ते नौजवानें आस्तै। इनें प्रतियोगिताएं च राष्ट्र गान गायन, “विकसित भारत @2047” विशे आहली इक निबंध लेखन मुकाबला ते ‘ड्रा योर फेवरिट फ्रीडम फाइटर’ शीर्षक कन्नै इक पेंटिंग मुकाबला शामिल ऐ। प्रतिभागी अपनी प्रविष्टियां, दरखास्तां आनलाइन जमा कराई सकदे न। प्रतियोगिताएं दे विजेताएं गी नगद ईनाम ते प्रमाण पत्र थोडन। सूचना ते जनसंपर्क मैहकमे नै नगरिकें गी इनें प्रतियोगिताएं कन्नै उत्साह कन्नै जुड़ने ते अपनी अवाज, दृष्टिकोण ते रचनात्मकता दा प्रदर्शन करियै इस स्वतंत्रता दिवस गी इक यादगार मौका बनान। इस बारै पूरी जानकारी मैहकमे दी आधिकारिक वेबसाइट पर दिक्खी जाई सकदी ऐ।

<><><><><><>

National Flag Day

22 जुलाई भारत दे इतिहास च इक महत्वपूर्ण दिन ऐ। 1947 च अज्जै दे दिन संविधान सभा नै आधिकारिक तौरा पर तिरंगे गी अजाद भारत दे राष्ट्री झंडे दे रूपै च अपनाया हा। तिरंगा अपने झूंङगी केसर, चिट्ठी ते सैल्ली पट्टियें ते अशोक चक्र दे कन्नै, हिम्मत, शांति ते तरक्की दा प्रतीक ऐ। एह एकता ते त्याग दे इक शक्तिशाली प्रतीक दे रूपै च आन-बान-शान कन्नै खड़ोते दा ऐ। जियां के तिरंगा पीढ़ियें गी प्रेरित करदा ऐ, राष्ट्र अज्ज आजादी दी लड़ाई दे आर्दशें गी चेता करा करदा ऐ ते उंनेंगी गर्व ते समर्पण दे कन्नै बनाई रखने दी अपनी बचनबद्धता गी दोहरांदा ऐ।

<><><><><><>

Weather

जम्मू खेतर च कल रातीं थमां लगातार बरखा होई जेदे कन्नै रोजमर्रा दा जनजीवन प्रभावित होआ। कई खेतरें च पानी जमा होई गेआ ते कई शिडकें पर पानी भरोची गेआ। खम्बे ते बिजली दिएं तारें गी नुकसान पुज्जने करी कई कस्बें च बिजली बी बाधित होई गई ऐ जेदे कन्नै लोकें गी परेशानी झल्लनी पेई। मौसम विभाग नै 24 जुलाई तगर बक्ख-बक्ख थाहरें पर अंधी झकखड़ दे कन्नोन्नी भारी बरखा दी पेशगोई कीती ऐ। जम्मू-कश्मीर आपदा प्रबंधन प्राधिकरण ते मजूदा मौसम दी स्थिति दे सरबंधै च इक परामर्श सलाह जारी कीती ऐ जेदे च अगले 72एं घंटें अंदर कठुआ, साम्बा, जम्मू, उधमपुर, डोडा, किशतवाड़, रामबन, रियासी, राजौरी ते पुंछ च चानचक्क हाड़ औने दा खतरा बने दा ऐ। लोकें गी दरयाएं ते नालें कशा दूर रौहने आस्तै आखेआ गेआ ऐ। आपदा दी स्थिति च 112 पर फोन करने दी सलाह दिती गई ऐ।

<><><><><><>